

## DIDZA' BURÓP BSÖLĚ'Ě PABLO YÖDZ TESALÓNICA

*Pablo rugapë' Dios bunách queë' Cristo naculé  
Tesalónica*

<sup>1</sup> Neda', Pablo, dzagquë' neda' Silvano len bi'i Timoteo, rugapa' Dios lbi'ili', nacli' queë' Xuzru' Dios len queë' Xanru' Jesucristo, zoali' Tesalónica.

<sup>2</sup> Rnabtu' lahuë' Xuzru' Dios len lahuë' Xanru' Jesucristo, uzá' ladxë'ë queëli' len gunë' ga soa dxi icj ladxí'dau'li'.

*Dios gchuguë' quegac bunách dul-la' cati' huödë'  
Cristo*

<sup>3</sup> Ral-la' guiétecztu'-në' Dios: Xclenu', ca nac queëli', böchi' lza'tu', ati' nac dxi'a guntu' cni, le zeaj ractër gdu ca réjlë'li' Dios. Lëzca' cni, ca nadxi'ili' lza'li' tuli' yetuli' zeaj racr gdu.

<sup>4</sup> Qui lë ni na', len yöl-la' rudziji rguíxjö'tu' ca nac queëli' laugac bunách queë' Dios ni, le rbözli' zxön ladxí', len réjlë'li' Dios zal-la' szxöni ta'bía ladxí'gac lbi'ili' bunách len szxöni rzaca' rguí'li', san rua' rlenli'.

<sup>5</sup> Yugu' lë ni tac bë' nac tsahui' ca rbequi xbeynë' bunách Dios. Ru'ë latj rzaca' rguí'li' na'a, quië gacli' lsaca' tsazli' ga ni' rna bë'ë Lë'.

<sup>6</sup> Nac tsahui' ca gunë' Dios, ubi'ë quegac nup tu'saca' zi' lbi'ili', gunë' ga la'zaca' la'guí'li' nup na'.

<sup>7</sup> Yetú ca', lbi'ili' rzaca' rguí'li' na'a, ati' ubi'ë queëli' Dios, gunë' ga uzí' ladxí'li' tsazxön len netu', dza ni' gla' lahuë' Xanru' Jesucristo, grujë' yehua'

yubá. Lunë' Lë' tsazxõn gbaz la'y ni'a në'ë, len lulu'ë lahui yõl-la' huac zxõn queë'.

<sup>8</sup> Gla' lahuë' Cristo dza ni' ca tu gui' zxõn cati' ni' uzí' lë' nup cunúnbë'gac Dios len cutún ca rna didza' dxi'a queë' Xanru' Jesucristo.

<sup>9</sup> Bunách cni, uzí' lë' lequë', ati' tsaz tsajtsu'ujuë' lu gui' gabíl. Tsaz la'cuitë' lahuë' Xanru' len ga nala'gac yõl-la' yení' queë' len yõl-la' huac zxõn queë'.

<sup>10</sup> Cni gac dza ni' cati' huödë' quië gac queë' yõl-la' ba ni'a qui le nacgac bunách la'y queë', ati' lubani queë' ca nacgac yúgu'të nup ta'yejlë' Lë'. Cni gac ca' queëli' le gyéjlë'li' le bentu' ina' lau qui lauli' ca nac queë' Jesús.

<sup>11</sup> Qui lë ni na' ca', rulídztecztu'-në' Dios queëru', rnábitu'-në' gáclenë' lbi'ili', len gunë' ga gacli' lsaca' gdél-li'li' lë na' bulidzë' lbi'ili' quië uzi'li' xbey. Lëzca' rnabtu' lahuë' gunë' ga gac gdu yúgu'të le rui' ládxi'li' gunli' le nac dxi'a len yúgu'të dxin runli' lu yõl-la' rejlë' queëli' Lë'. Len yõl-la' huac queë' Dios gunli' lë ni.

<sup>12</sup> Cni gac, gac yõl-la' ba qui lë' Xanru' Jesucristo ni'a qui le runli', ati' gacli' lbi'ili' bica' ba ni'a qui le gunë' Lë', gac ca nac le buzá' ladxë'ë queëli' Dios queëru' lenca' Xanru' Jesucristo.

## 2

### *Ulu' lahuë' Bönni' Xõhui'*

<sup>1</sup> Na'a, ca nac qui dza huödë' Xanru' Jesucristo, len ca gac, dutubë' rë'u queë' Lë', ráta'yutu' lauli', böchi' lza'tu',

<sup>2</sup> cui güi'li' latj nu gun chixi lbi'ili' ca nacgac le gzxi' lu na'li'. Cutu cuequi baguí'i icj ládxi'dau'li'

ni'a qui bi ta'guíxjö'ë bönni' ta'zí' yè'ë, ta'né' zóalenè' lequè' Dios Bö' La'y, o ni'a qui bi didza' tui' bunách, o ni'a qui bi nayúj tu lu guích ta'né' netu' bsöla'tu', le ta'ná: “Chgdöd dza huödè' Xanru'.”

<sup>3</sup> Cutu ca' güi'li' latj nu si' ye'i lbi'ili', le cutu gdxin dza ni' huödè' Jesús chqui' cutu la'lá' lahui zi'al zian nup la'dá'baga' Dios, ati' gla' lahuè' Bönni' Xöhui', bönni' na' ral-la' tsaziè' lu gui' gabíl.

<sup>4</sup> Bönni' ni gzaguë'ë, len lu yöl-la' run ba zxön cuinë' tá'baguë'ë yúgu'tè le naqui queè' Dios o le tun zxön bunách lu yöl-la' run Dios ba la'n quequè'. Gunè' cni bönni' na' ga gdxintè cö'ë ca Dioscz lu gdau' ga nac xlatjè' Dios, len gun cuinë' ca Dios.

<sup>5</sup> ¿Naru' cu rajneyli' gdíxjöi'da' lbi'ili' yugu' lè ni cati' ni' zóalena' lbi'ili'?

<sup>6</sup> Na'a, núnbè'li' Nu ruzaga' xnözè' Bönni' Xöhui' na', cui gla' lahuè' zi'al ga gdxinr dza queè'.

<sup>7</sup> Chrun dxin le nagachi' qui le nac xöhui', san na'atè zoa Nu ruzaga' xnözè' Bönni' Xöhui' na' ga gdxinr dza ucuít cuini Nu na' ruzaga' xnözè'.

<sup>8</sup> Ni'r gla' lahuè' Bönni' Xöhui' na', ati' Xanru' Jesucristo uxicjè' lè' len bö' gruj ru'ë, len usnitiè' lè' len le tsèp yös yení' qui dza huödè'.

<sup>9</sup> Cati' gdxinë' Bönni' Xöhui' na', len yöl-la' huac qui Satanás tu' xöhui' gla' lahuè'. Len yöl-la' huac qui le cunáč, gunè' yúgu'tè yöl-la' huac zxön, len yúgu'tè le lac bè', len yúgu'tè le lun ga lubani bunách.

<sup>10</sup> Len yöl-la' huac qui le cunáč, gunè' cni laugac nup la'nít le cugulazí' lu na'què' gdu ládxi'què' le nac gdu'tè li, quiè lulé'.

<sup>11</sup> Qui lè ni na' Dios gu'ë latj gdxin quequè' tu le run yöl-la' huac le si' ye'i lequè' quiè la'yejle'ë le

cunáčz.

<sup>12</sup> Cni gac quië la'baga' zxguia' yúgu'të nup cutu gulayejlë' le nac gdutë li, san guladzág ládxi'gac le cunác tsahui'.

### *Nup gröczë' Dios quië lulá*

<sup>13</sup> Böchi' lza'tu', lbi'ili' na' nadxi'inë' lbi'ili' Xanru', ral-la' guiétecztu'-në' Dios: “Xclenu’”, ni'a qui le nac queëli', le chgröczë' lbi'ili' Dios dza ni'të quië ulali' ni'a qui le runë' Dios Bö' La'y, quië gacli' gdu dxi'a le réjlë'li' le nac gdutë li.

<sup>14</sup> Quië gac cni queëli', Dioscz bulidzë' lbi'ili', quië gdél-li'li' gunli' tsazxõn Xanru' Jesucristo lu yení' queë'. Cni gac ni'a qui didza' dxi'a runtu' lban qui.

<sup>15</sup> Qui lë ni na', böchi' lza'tu', gul-zóa tsutsu len gul-gún chi'i didza' na' nazëdli', le bë'lentu' lbi'ili' len buzujtu' queëli' lu guich.

<sup>16-17</sup> Rnabtu' lahuë' Xanru' Jesucristo len lahuë' Xuzru' Dios, utipë' ládxi'li' len gunë' ga gacli' tsutsu ca nac yúgu'të le nac dxi'a runli' len yúgu'të didza' dxi'a rui'li'. Lëczë' nadxi'inë' rë'u len bennë' queëru' le ruhuí' zxõntecz rë'u len le nac dxi'a runru' löz, yugu' lë na' buzá' ladxë'ë queëru' Dios.

## 3

### *Le ral-la' gnábiru'-në' Dios*

<sup>1</sup> Yetú ca', böchi' lza'tu', gul-lidzë' Dios gnábili'-në' gáclenë' netu', runtu' lban ni, quië së xtidzë'ë Xanru' ati' lun lei ba la'n bunách, gac ni ca na' guc ga ni' zoali'.

<sup>2</sup> Gnabli' ca' quië ulatu' lu na'quë' bönni' xöhui' tua'dö', le cutu ta'yejlë' Dios yúgu'të bunách.

<sup>3</sup> Na'a, le runë' ca rnë' Xanru', gunë' ga gacli' tsutsu len gun chi'ë lbi'ili', cui gdzunli' lu na' tu' xöhui'.

<sup>4</sup> Ruzxöni ládxi'tu'-në' Xanru' ca nac queëli', gunli' yugu' lë ni zi'a gnabtu' lauli', ca na' chrunli'.

<sup>5</sup> Rnabtu' lahuë' Xanru' usë'ë ládxi'li' quië gdxi'ili'-në' Dios, len cözli' zxön ladxi' ca na' benë' Cristo.

### *Ca run bayúdx gunru' dxin*

<sup>6</sup> Ni'a qui lë' Xanru' Jesucristo rna bé'itu' lbi'ili', böchi' lza'tu', gcuitli' ga nacu'ë böchi' lza'ru' ta'dazë' ca' len cutu tunë' ca nac zxba busëditu' lbi'ili'.

<sup>7</sup> Nóziczli' ral-la' gunli' ca runtu' netu', le cutu ca' gdaztu' ca' netu' ga ni' zoali'.

<sup>8</sup> Cutu gdagu dáduztu' le bennli' queëtu', san lu yöl-la' ruúbi ruguí'i len lu yöl-la' rcuidi' bentu' dxin rël len të dza cui usaca' zi'tu' nituli' lbi'ili'.

<sup>9</sup> Cni bentu' quië gactu' lauli' ca tu le ruluí'i lbi'ili' ca ral-la' gunli', zal-la' dë lu na'tu' gnabtu' bi gunli' queëtu'.

<sup>10</sup> Lëzca' cati' ni' gzóalentu' lbi'ili', gna bé'itu' lbi'ili' cni, le rna: "Chqui' cutu rë'nnë' gunë' dxin nu bönni', cutu güi'li' le gahuë' bönni' na'."

<sup>11</sup> Cniz rnatu' le ryönitu' nútsa'quë' ladjli' bönni' ta'dazë' ca', cutu bi dxin tunë', san ta'dazë' ca' bi tun bi ta'në'.

<sup>12</sup> Ni'a queë' Xanru' Jesucristo rna bé'itu' bönni' tunë' cni, len ruchiztu' icj nagquë' lunë' dxin lu yöl-la' rböz dxí'adau', quië gac lahuë' le naqui quégaczhë'.

<sup>13</sup> Na'a, böchi' lza'tu', cutu soa dxili', gúnteczli' le nac dxi'a.

14 Chqui' núti'těz bönni' cutu gunë' ca rna xtídza'tu' ruzujtu' lu guich ni, gul-gún ga gac bë'ë bönni' na', len cutu gunli' tsazxón lë' quië utui'në'.

15 Cutu ral-la' glé'ili'-në' ca bönni' curlé'inë' lbi'ili' dxi'a, san gul-sá' ladxë'ë ca böchi'czli'.

*Pablo rgu'ë lu në'ë Dios böchi'ru' nacu'ë Tesalónica*

16 Rnabtu' lahuë' Xanru' gúnteczë' ga soa dxi icj ládxi'dau'li' ca nac yúgu'të le runli' len sóalenë' yúgu'tëli'. Lëczë' runë' ga zoa dxi icj ládxi'dau'ru'.

17 Neda', Pablo, len na'cza' ruzuja' lu guich ni le rugapa' Dios lbi'ili', ati' nac tu le nac bë' yúgu'të guich rsöla'a. Cniz ruzuja' lu guich.

18 Le ruzá' ladxë'ë queëru' Xanru' Jesucristo gac queëli' yúgu'tëli'. Ca' gac.

**Didza' cub rucá'n tsahui'**  
**New Testament in Zapotec, Southern Rincon**  
**(MX:zsr:Zapotec, Southern Rincon)**

copyright © 1992 Wycliffe Bible Translators, Inc.

Language: Zapotec, Southern Rincon

Translation by: Wycliffe Bible Translators, Inc.

Zapoteco, Rincón Sur [zsr], Mexico

**Copyright Information**

© 1992, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Southern Rincon

**© 1992, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 28 Dec 2024 from source files  
dated 29 Jan 2022

7feac3cb-fa00-54f1-b2be-b4d6aa29755b